



**Komunikadu Imprensa**  
**Tribunál Judisiál Primeira Instánsia Dili**  
**07 Fevereiru 2025**

**Prokuradór no juis sira kontinua la utiliza artigu apropiadu iha kazu sira ho natureza violénsia doméstika**

Prokuradór no juis sira kontinua la utiliza artigu apropiadu iha kazu sira ho natureza violénsia doméstika. Kestaun ne'e, JSMP nota tan iha JSMP nia observasaun ne'ebé hala'o iha Dezembru 2024 no Janeiru 2025, iha Tribunál Judisiál Primeira Instánsia Dili, ba kazu ofensa ba integridade física simples ho natureza violénsia doméstika (VD) ho Nú. Prosesu : 0003/24.DIMTN no iha Tribunál Judisiál Primeira Instánsia Oekusi ba kazu ho tipu no natureza hanesan ho Nú. Prosesu 0312/23.OESIC.

Iha kazu ho Nú. Prosesu : 0003/24 DIMTN, mezmuke krime ne'ebé arguidu komete dala ida de'it maibé objetu ne'ebé arguidu uza hodi baku ba iha ofendida ka vítima nia ulun ne'e kadera-ai ne'ebé iha potencia bo'ot bele hamate ka mínimu bele hamosu konsekuénsia grave ba ofendida ninia vida. Iha kazu ne'e, alende uja kadera-ai, alvu ka fatin atinjidu ne'e iha ulun ne'ebé frázil/vulnerável atu reziste hasoru objetu ne'ebé todan. Ne'e bele prova liuhosi aktu ne'e rezulta ofendida sofre kanek no raan iha ulun no ofendida ba halo tratamentu iha sentru saúde no hetan suku pontu sanulu-resin-tolu (13) iha parte ulun.

JSMP konsidera katak arguidu nia aktu ne'e grave no ameasa tebes ofendida nia vida maibé prokuradór akuza de'it ho artigu 145 Kodigu Penál (KP) kona-ba ofensa ba integridade física simples. Iha kazu ne'e mós tribunál la halo avaliasaun no ezamina klean ba faktu sira ne'ebé prodús durante julgamentu atu konsidera se akuzasaun ne'e relevante no apropiadu duni ho ofensa simples ka iha nesesidade atu halo alterasaun ba artigu ne'ebé relevante liu. Tanba falta avaliasaun profunda, ikus mai tribunál kondena de'it arguidu ho pena multa US\$45.00.

Enkuantu, Iha kazu ho Nú. Prosesu 0312/23.OESIC, prokuradór akuza katak arguidu tuku dala rua (2) iha ofendida nia hasan karuk no rezulta kanek, metan, bubu no moras.

Alende ne'e, arguidu tuku tan dala ida (1) iha inus no rezulta kanek, raan no moras. Liután arguidu mós rakut ofendida nia fu'uk no buti iha kakorok rezulta moras. Arguidu kontinua tebe tan dala rua (2) iha ofendida nia kabun rezulta moras to'o ofendida desmaia no monu ba rai tanba kazu ne'e akontese iha momentu ne'ebá ofendida isin rua (*gravida*) hela fulan lima (5).

Iha akuzasaun deskreve katak kazu ne'e akontese bainhira ofendida husu osan US\$20.00 ba arguidu atu hola foos, nune'e arguidu ho ofendida diskute malu no arguidu halo agresaun refere hasoru ofendida.

Iha situasaun ne'ebé ofendida ho kondisaun gravida fulan lima (5) no arguidu halo agresaun dala barak, ita bele imajina katak ofendida iha ameasa ka nia-vida iha risku nia laran. Pior liután arguidu tebe iha ofendida nia kabun, ne'e la'ós fó risku de'it ba ofendida nia vida maibé ba mós bebe iha ofendida nia kanotak. Infelizmente prokuradór akuza de'it ho ofensa ba integridade fízika simples no dala ida tan tribunál la halo ezersísiu hodi avalia faktu hirak ne'e, nune'e tribunál aplika de'it ho pena prizaun tinan ida (1) suspende ba tinan ida (1) fulan ida (1).

“JSMP konsidera artigu 145 KP kona-ba ofensa ba integridade fízika simples la relevante no la apropriadu atu aplika ba aktu sira mai ho gravidade ne'ebé ameasa ofendida sira ninia vida no tratamentu aat sira. JSMP fiar katak atu redus kazu violénsia doméstika iha territóriu, ministériu Públiku no tribunál tenke akuza ho artigu ne'ebé apropriadu no aplika pena ne'ebé ekilibriu tuir gravidade hosi krime ne'ebé mak arguidu sira komete”, dehan, Sra. Ana Paula Marçal, Diretora Ezekutiva JSMP.

Artigu 154 KP la espresamente define kona-ba rekizitu prova ne'ebé ezije repetisaun. Prokuradór no juis sira tenke interpreta 'maus-tratus' nu'udar asaun ka ofensa fíziku ka psíkika ba ofendida iha forma ida kruel no dezumana la'ós asaun ka ofensa repetisaun. Iha ezemplu kazu rua iha leten hatudu faktu krueldade ne'ebé arguidu sira halo hasoru sira ninia kónjuje (*pasangan*) no ida-ne'e la nesesariamente rekere prova sira repetitivu atu akuza no kondena ho krime maus-tratus.

Iha Manual Investigasaun Ofensa Violénsia Bazeia ba Jéneru ba Ministériu Públiku, pájina 33, ne'ebé prodús iha Maiu 2024, orienta ho klaru katak 'maus-tratus' bele konstitui maus-tratus fíziku no psikológiku no ida ne'e la presiza ka la rekere aktu/asaun repetitivu hasoru ofendidu/a atu priense elementu ba krime maus-tratus ne'ebé preve iha artigu 154 KP. Tanba ne'e, JSMP husu atu bainhira elabora akuzasaun tenke kaer ba mata-dalan ne'ebé Ministériu Públiku adopta ona. JSMP konsidera katak artigu 154 KP kona-ba maus-tratus ba kónjuje mak apropriádu liu bazeia ba aktu sira ne'ebé arguidu sira komete hasoru ofendida sira.

JSMP konsidera krime rua ne'e nu'udar krime ne'ebé sériu tanba aktu hirak ne'e prodús implikasaun ne'ebé todan/kruel no ameasa ofendida sira nia vida. Ho razaun ne'e, sistema justisa formál tenke iha kbiit atu proteze fetu no labarik sira iha família no prevene krime hanesan akontese iha futuru atraves hosi akuzasaun no desizaun sira ne'ebé mai hosi prokuradoria no tribunál sira halo.

Bazeia ba JSMP nia observasaun durante ne'e kona-ba desizaun ba kazu sira ho natureza violénsia doméstika no analiza ba provizaun artigu 145 no 154 KP ne'e, haree katak iha diferensa interpretasaun no aplikasaun ba provizaun artigu rua ne'e. Maioria autór tribunál sira konsidera aktu ruma nu'udar krime maus-tratus bainhira aktu hirak ne'e iha repetisaun ka akontese liu dala ida ka bebeik ona. Diferensa interpretasaun no aplikasaun ne'e fó impaktu ba aplikasaun pena sira ne'ebé la justu no la proporsionál (la balansu) tuir krime idak-idak nia gravidade no sirkunstánsia sira. Kestaun interpretasaun no aplikasaun ne'ebé la uniforme ka ketketak ne'e, fó impaktu ba justisa, liuliu ba parte sira ne'ebé mai buka justisa. Ida ne'e tanba, dala barak akontese katak pena la hanesan Tribunál decide no aplika ba kazu ne'ebé nia natureza no gravidade hanesan.

Prokuradór tenke eskolla provizaun ne'ebé apropriadu ba krime VD sira tuir krime ida-idak ninia gravidade no sirkunstánsia atu asegura katak krime ida-idak hetan kondensasaun ne'ebé reflète no ekilibriu ho arguidu ninia hahalok.

Importante teb-tebes atu avalia elementu no natureza krime ida-idak tuir krime ne'e nia kompleksidade no risku potenciál hosi kazu ida-idak bazeia ba avaliasaun profunda antes termina krime ne'e nia tipu nune'e bele fó pena ne'ebé ekilibriu no justu ba arguidu.

JSMP fiar katak ho kapasidade, esperiénsia no iha ona mata-dalan provizaun legál sira ne'ebé iha, prokuradór sira sei halo investigasaun ida rigór no halo akuzasaun ida ne'ebé apropriadu hodi fasilíta tribunál aplika pena ne'ebé ekilibriu no justu.

**Atu hetan informasaun klaru liután favór kontaktu:**

Ana Paula Marçal  
Diretora Ezekutiva JSMP  
Telefone: 3323883/77040735  
Diresaun e-mail: [ana@jsmp.tl](mailto:ana@jsmp.tl)  
[info@jsmp.tl](mailto:info@jsmp.tl)  
Website: <http://jsmp.tl>

